

**БОСНА И ХЕРЦЕГОВИНА  
ПАРЛАМЕНТАРНА СКУПШТИНА  
БОСНЕ И ХЕРЦЕГОВИНЕ**

Делегација у Парламентарној скупштини  
Организације за  
безбједност и сарадњу у Европи



**BOSNA I HERCEGOVINA  
PARLAMENTARNA SKUPŠTINA  
BOSNE I HERCEGOVINE**

Delegacija u Parlamentarnoj skupštini  
Organizacije za  
sigurnost i saradnju u Evropi  
Izaslanstvo u Parlamentarnoj skupštini  
Organizacije za  
sigurnost i suradnju u Evropi

**PARLIAMENTARY ASSEMBLY OF BOSNIA AND HERZEGOVINA**  
Delegation to the Parliamentary Assembly of the Organization for Security and Co-operation in Europe

---

Broj: 01,04/3,03/11-05-1-134/14

Sarajevo: 10. 6. 2014. godine

**I Z V J E Š T A J**  
**SA SASTANKA NACIONALNIH DELEGACIJA ZEMALJA JUGOISTOČNE**  
**EVROPE U PARLAMENTARNOJ SKUPŠTINI OSCE-a,**  
**ZAGREB, 19. MAJ 2014. GODINE**

**Sarajevo, juli 2014. godine**

Predsjedavajući Doma naroda PSBiH i član Stalne delegacije Parlamentarne skupštine BiH u PSOSCE-a Dragan Čović, sekretar Stalne delegacije PSBiH u PSOSCE-a Jelena Rajaković, i svjetnica predsjedavajućeg Doma naroda Renata Paškalić učestvovali su na sastanku nacionalnih delegacija zemalja Jugoistočne Evrope u Parlamentarnoj skupštini OSCE-a, koji je održan 19. 5. 2014. u Zagrebu.

Na sastanku se razgovaralo o načinima saradnje u okviru PSOSCE-a, o dva dokumenta koji će biti prezentirani na ljetnom zasjedanju u Bakuu i koji omogućavaju da u narednom periodu zemlje Jugoistočne Evrope sarađuju i imaju veći uticaj u samom OSCE-u, a onda i u širim međunarodnim okvirima.

Članovi delegacija Bosne i Hercegovine, Crne Gore, Hrvatske, Slovenije i Srbije istakli su da su se delegacije okupile u teškom vremenu, kada je ove tri zemlje pogodila prirodna katastrofa te je na sastanku razgovarano i o poplavama kao i načinima rješavanja tog problema u budućnosti.

Predsjedavajući Doma naroda Parlamentarne skupštine BiH Dragan Čović istakao je da i ova situacija pokazuje koliko smo pojedinačno male zemlje i koliki je značaj međusobne regionalne saradnje, te da Savu i druge rijeke treba ukrotiti, što niko ne može sam, nego svi zajedno kroz jedan megaprojekat. On je naglasio da ova situacija pokazuje da se moramo drugačije organizirati i, umjesto spekulacija da li se moglo više ili manje uraditi, najprije tražiti i pronaći način da se zbrine svaka ugrožena porodica i osigura njeno vraćanje normalnom životu.

Dragan Čović naveo je da je ovaj sastanak dobar početak te kako se nada da će već na sljedećem okupljanju Parlamentarne skupštine OSCE-a biti usvojen zajednički stav kada je u pitanju ova regija. On je istakao značaj zajedničkog nastupa grupe zemalja Jugoistočne Evrope koji će poboljšati njihovu saradnju kroz OSCE.

Predsjednik Hrvatskog sabora Josip Leko rekao je da je hrvatska želja politika saradnje, podizanje demokratskih standarda i razvoj demokratskih institucija te podizanje novoa sigurnosti u zemljama u okruženju. On je naglasio kako će Hrvatska kao članica EU tražiti pomoć iz evropskih fondova namijenjenih za vanredne situacije te da će se zbog povezanosti u elementarnim nepogodama tražiti novac i za susjedne države.

Predsjednik Parlamentarne skupštine OSCE-a i predsjednik Skupštine Crne Gore Ranko Krivokapić rekao je da je OSCE dobio novu ulogu na međunarodnoj sceni otvaranjem novih žarišta u regiji OSCE-a. Izrazivši podršku ovakvom vidu regionalne saradnje u okviru PSOSCE-a, on je istakao da sada postoji i odgovornost regiona, koji, nažalost, ima iskustva s

problemima s kojim se sad susreću druge regije, da pomogne da se te krize prevladaju, a da naš region u novoj fazi razvoja ujedini napore oko zajedničkih vrijednosti

Dijana Vukomanović, predsjedavajuća Delegacije Narodne skupštine Republike Srbije u Parlamentarnoj skupštini OSCE-a rekla je da sve zemlje regije pripadaju jednom značajnom civilizacijskom krugu koji je mnogo širi od zapadnog Balkana, te da zajedno dijele historijsku, kulturnu i ekonomsku saradnju.

Ona je dodala da je za Republiku Srbiju i Bosnu i Hercegovinu vrlo ohrabrujuće to što su i Slovenija i Hrvatska uspjele ući u EU i da to ohrabruje ove dvije zemlje na evropskom putu.

U nastavku sastanka učesnici su se saglasili da za nove izazove koji predstoje svakoj od zemalja treba iskoristiti zajedničke kapacitete našeg regiona. S tim ciljem usaglašen je i tekst Nacrta rezolucije o saradnji u Jugoistočnoj Evropi, koji će biti podnesen na predstojećem godišnjem zasjedanju te organizacije (juni/juli 2014., Baku, Azerbejdžan). U Rezoluciji se pozdravlja ostvareni napredak u regionalnoj saradnji zemalja Zapadnog Balkana i izražava podrška evropskoj perspektivi svih zemalja Jugoistočne Evrope. Kritizirajući nekonstruktivne predrasude prema zemljama ovog regiona, Rezolucijom se poziva EU da izbjegne stvaranje vještačkih prepreka zemljama regiona koje još nisu postale članice Evropske unije.

Na sastanku je usaglašen i tekst Memoranduma o saradnji nacionalnih delegacija parlamenata zemalja Jugoistočne Evrope u PSOSCE-a, kojim se učesnici zalažu za prijateljske i dobrosusjedske odnose i zajedničku evropsku perspektivu svih zemalja Jugoistočne Evrope, opredjeljuju za podsticanje uspostavljanja vrijednosti i standarda OSCE-a i Evropske unije, te podržavaju reforme koje su u zemljama regije potrebne u procesu evropskih i evroatlantskih integracija.

Memorandumom se učesnici obavezuju na podsticanje i unapređivanje međusobnih odnosa kroz kooperativno partnerstvo i dogovor, jačanje uloge regije Jugoistočne Evrope u Parlamentarnoj skupštini OSCE-a i saradnju na predstavljanju i afirmaciji pojedinačnih i zajedničkih interesa u tri glavne OSCE-ove dimenzije saradnje u oblasti evropske i globalne sigurnosti.

Predsjedavajući Doma naroda PSBiH i član Stalne delegacije Parlamentarne skupštine BiH u Parlamentarnoj skupštini OSCE-a Dragan Čović, koji je u Zagrebu učestvovao na sastanku nacionalnih delegacija parlamenata zemalja Jugoistočne Evrope u PSOSCE-a, sastao se i s predsjednikom Republike Hrvatske Ivom Josipovićem.

Tokom sastanka istaknuto je da je potrebno unaprijediti odnose ovih zemalja i podstaći razvoj uzajamno korisne saradnje u svim oblastima te je zaključeno da intenzivna saradnja Bosne i Hercegovine, Crne Gore, Hrvatske i Srbije u okviru OSCE-a može dati snažan impuls integracionim aktivnostima i reformskim procesima u regionu. Čović je istakao da se region nalazi u fazi stišavanja emocija, ali da zemlje regiona treba da djeluju organiziranije. Pri tome, on je naglasio da posebnu važnost treba posvetiti međusobnom parlamentarnom povezivanju. Predsjedavajući Doma naroda naveo je da je prirodna katastrofa koja je zadesila BiH, Srbiju i Hrvatsku pokazuje koliko su pred ovakvim i drugim problemima granice nevažne i koliko nas često život upućuje jedne na druge. Budućnost cijelog regiona je u Evropskoj uniji, rekao je tokom susreta predsjednik Ivo Josipović i naglasio da su kao evropska tekovina i ciljevi OSCE-a vrlo važni za zemlje našeg područja. On je dodao da svi mi još uvijek tražimo formulu stabilnosti i trajnog mira i pozdravio ovaj vid regionalne saradnje.

SEKRETAR  
STALNE DELEGACIJE PSBiH U PSOSCE-a

Jelena Rajaković

Dostaviti:

- Kolegiju Predstavničkog doma
- Kolegiju Doma naroda
- Komisiji za vanjske poslove Predstavničkog doma
- Komisiji za vanjsku i trgovinsku politiku, carine, saobraćaj i komunikacije Doma naroda
- Stalnoj delegaciji PSBiH u PSOSCE
- Sektoru za međunarodne odnose i protokol

Kopija: Ministarstvo vanjskih poslova BiH